

四庫全書

集部

欽定四庫全書

集部
芻蕘集卷二

詳校官編修_臣曹城

中書_臣劉源溥覆勘

總校官進士_臣繆琪

校對官學正_臣陳木

膳錄監生_臣戴天民

欽定四庫全書

集部六

芻蕘集

別集類五明

提要

臣等謹案芻蕘集六卷明周是修撰是修初名德以字行泰和人洪武中舉明經授霍邱訓導遷周王府紀善王多不法是修動繩以禮今集中修已十箴與保國直言二篇皆是時作也王敗之後官屬皆緣坐是修以能諫

得免改調衡王府紀善既而入直翰林預纂
修建文四年燕王反兵薄京城是修與楊榮
楊士奇胡靖金幼孜等約同死國難諸人陽
諾之燕兵既入士奇等爭先推戴是修乃獨
詣尊經閣自經乾隆丙申

賜謚忠節事迹具明史本傳後解縉為作誌銘但
稱歸京師為紀善預翰林纂修以死竟沒其
殉節事楊士奇為作傳乃言其自經應天府

學蓋縉作誌在永樂元年士奇作傳則在宣
德四年也傳又稱是修數論國家大計至指
斥用事者誤國用事者怒衆共挫折之云云
蓋欲明是修非齊黃之黨以避時忌然革除
之際取義成仁但問臨難死不死不問持議
同不同縱使有黨亦不害其為忠臣不能以
是抑是修也是集為其孫應鰲所刊凡詩三
卷賦及雜文三卷非惟風節凜凜溢於楮墨

即以文章論之亦復無愧於作者未附縉所作誌銘士奇所作傳可謂白茅之藉矣姑並存之益以彰是修也乾隆四十三年六月恭校上

總纂官

臣紀昀

陸錫熊

孫士毅

總校官

臣陸

費

墀

欽定四庫全書

芻蕘集卷一

五言古詩

述懷五十三首

登高望八表世道何悠悠
衰榮無定極往復更相酬
誰為陽和春及此肅殺秋
人生忽如寓百歲苦不周
鶴髮每先待朱顏難久留
彭殤均絕逝何庸咨短脩
惟當飲

明
周是修
撰

美酒樂從天者游

吳水秋浩浩楚山晴蒼蒼美人在南國節操凌冰霜隔
此萬里遠夢寐時彷徨西風吹鴻鴈音耗不得將行行
江皋路采采夫容芳愁去吳水濶愁來楚山長無能共
清渚飛作雙鴛鴦

東汎玄冥海西登太華峰豈不念遐征塵土將安從仙
人韓湘子千載顏如童飄飄紫雲上羽輪翳回風大笑
揖王喬長歌隨赤松嗟彼世間人生死無終窮

晝有千種慮夜無一枕眠所以思者何美人邈遠天秋
風入庭樹慘慘號寒蟬飄飄雲想衣灼灼花想鈿玉顏
不可見空記平生言秦吳非易越悵望寒鴻前

幽冀車可驅洞庭舟可浮何能離塵鞅超然賦遠游遠
游無有期徒此坐悲秋帝子滯香魄萬古湘水頭蒼梧
咫尺距不見重瞳丘何以托遺恨野竹淚痕留

相如未得意偶然遇文君何因即同載萬里瀼西行婦
德固已失竊皆名亦成匪為足素願聊以慰羈情古禮

重親迎終始猶難憑所以既榮貴一朝聘茂陵

韓信本忠臣一心佐漢主指揮百萬師竭力定疆宇大義重如山王封就荆楚來朝忽被縛無乃大荼苦淮陰雖可侯終愧虎變鼠功成不退身無恨蕭與呂

屈指古石隱吾愛黃綺公潛身遠世禍落落商山中學仙非有意採芝寧固窮為國遂一起反正如旋蓬功成仍蹈海羽儀穹飛鴻徒令厲操者萬古歌清風

鳳飛九霄上五章翳朝霞乃集大皇野保珍遠物華竹

實以為食梧桐以為家聖世既休明四海靜無瑕感治
遂來儀和鳴獻仙葩復憂樊籠累竟去不可遮何能隨
燕雀枳棘爭喧譁

白璧生崑崙輪致乃人間韞匱以待價不與時往還銜
售非所欲棄擲非所患借令橫道側終自遠險艱千金
謝雕琢寧為瑱與環五瑞出皎潔願隨羣后班明王重
朝會萬古光聖顏

我有兩龍劍閱世三千秋堅鋼出百鍊苔色古且幽異

哉歐冶子功與造化侔
劃水蛟鱷斷指空鬼神
愁精光不可掩
夜夜衝斗牛所恨際休明
鋒芒久潛收願持獻
天子為斬佞臣頭

桂樹生高崖春風吹拂之
崖桂自不芳春風本無私
非疾桃李艷由來各有時
暖雨都城陌晴日倡家蹊
雕鞍逐繡轂行樂競繁滋
翫賞朝不食歌舞夜忘疲
秋霜搖落盡芳芬誰復知

誰種岩上竹如斯茂且長
誰植畹中蘭如彼幽且芳
猗

綺浥朝露灑灑凌秋霜亦不羨新綠亦不咲芸黃但愛
貞自保歲時永相望竹以中簫韶蘭以紉佩纓美人如
既遇遂爾遠翱翔

朝游芳菲園望望桃李花匪不愛其艷榮衰終奈何長
安貴游子走馬事豪奢年垂二十餘意氣橫天涯晝食
信陵門夜宿嬌嬈家青陽有徂邁白日有西斜歸來覽
明鏡徒感雙鬢華

涉江采芙蓉秋水湛虛碧停橈向中渚浩歌感疇昔世

人恣險巧奔走竟朝夕攘攘豺與狼小大相啖食願言
擴風清一覩義農日皇王直垂拱四海仰至德孰知太
古初混沌無一物

蜂蟻有君臣蚊蚋岩穴間肝心事其上時往時乃還一
以勤致遠一以固守關誓不圖苟活使君罹險難微物
尚如此人胡獨弗然嗟彼趙高徒擅國恣兇奸下視蜂
蟻性何能無厚顏

走馬百萬里言志天一方北風振大漠白日慘精光前

有桑乾原傳是古戰場狐號雜鬼哭死骨如高岡寒雲
塞關隴沙草萋已黃云昔霍嫖姚兵氣橫秋霜長驅無
敢敵親手斬戎王功成畫麟閣龍沙空莽蒼

去日既已矣來日復如何百年寓天宇曾無瞬息過少
壯不為樂老大空情多東風入都國萬物感陽和葡萄
熟千斛日縱金叵羅結交貴公子劍佩聲相磨高歌引
雄辨取醉無其它寧為小兒女白首歎蹉跎

岱山東峨峨上與雲霧連距天不咫尺星宿羅其巔德

位並羣岳崇祀每當先君哉有虞氏因時惕乾乾重瞳
燭萬里體用何兼全五載春仲月龍駕來翩翩玉帛耀
精靈禮樂感神天以不讓土壤故乃大若然

黃河發西昊下決崑崙峰奔流幾萬里上與滄溟通混
沌越千載載清明聖逢念哉昔多士禍已投其中精魂
竟何訴事業一朝空君子貴知命胡為罹此凶坑儒剪
羸裔用傑興炎宗所以血未化唐祚亦隨終

大化每不息滾滾東逝波少壯能幾時其如老大何盛

極衰已至樂盡哀還多白日無復返青陽寧再過昨為
綺羅園今成衰草坡昨為紅顏子今成髻皤皤云胡有
美酒日夕不高歌

至理無定在一物一有之達士每豹變愚夫獨狐疑死
生事所常輪遞何休時衰榮分所固來往可前期不見
東園花灼灼方滿枝轉眼逐風散零落已塗泥借問路
行人陸陸爾何為

朝出都城門遙望都城道道上誰家兒駿馬嘶煙草王

帶宮錦袍意氣凌穹昊斜過寶釵樓樓前春正早樓頭
美人咲咲臉逾花好下馬醉紅粧芳情兩傾倒明日復
明年相看不知老

十載長安路始出咸陽關倦行弔今古落日北邙山
上何所有萬塚榛蕪間強半金井塌朽骨露斑斑人語
狐兔走煙景莽愁顏多少英雄人棄世不復還貴賤共
無主歎息未應閒

昨日還今日韶光易云徂今年復明年萬物遞榮枯人

徒為物靈而於物不如貴賤共奔走攘攘混塵途不見
南山松青青千歲餘不見蓬海鶴翩翩長與俱念哉此
人世幾許竟成虛

昔人多愛酒為會酒之真不飲愁萬結飲之愁自伸醉
醒醒復醉恍然忘此身八仙本高士七賢豈衆倫囊括
經濟術觴咏日逡巡窮通付天命富貴等浮雲九原今
可作願爾與為羣

籬落秋蟲鳴煙火四鄰息匡坐不笑語悠然念羣物春

風昨相過天地皆顏色從誰降嚴霜一朝盡摧絕壯士
起北邊美人怨南國光陰無少留胡為久離別老大空
歸來相看兩華髮

賤貧衆所惡而乃士之常束書返故園結屋瞰清江稍
種門前柳亦種墻下桑深居觀元運外物徒擾攘達人
無不可用行舍則藏固哉亞父輩赤心龍戰場劍術豈
不精奈何天命王

日入機暫息日出還復萌世俗恣貪翫晝夜亦無分不

自揣已量碌碌空勞生智哉龐德公移家歸鹿門山月
長對眠隴雲時伴耕身潛名益遠心斂道彌宏惟存一
清約持之遺子孫

屏跡衡門下久於世物違君子抱大道動靜貴知機躬
畊足我食婦蠶充我衣萬事付不理雲林日因依湘水
有懷石首山有采薇大節固莫奪天命亦何非子真千
古士願與爾同歸

人道寧有異天命亦何窮禮始經夫婦由為萬世宗荒

哉楚襄王浪跡陽臺中神姝那可御夢寐空情濃海水
三十丈巫山十二重朝雲何處在暮雨莫相從

萍根無所著蕩漾江漢間與浪共浮沒隨風相往還乾
坤同大塊日月比循環人生少百歲能得幾時閒物情
常橫擾世事苦相關鼎湖龍既遠胡髯那可攀居然就
衰暮歎息此容顏

朔風號海甸十月雪漫漫畫戟攢雲暗鐵馬蹴冰寒但
顧主恩重寧論北伐難漢宮抵疎勒敵騎淨皋蘭孤軍

勢逾險百戰陣仍完殺氣無時合兵符隱夜看功名何足貴所願致君安

漢國千年固遙天萬里平那堪風雨夜夢不到咸秦漢漠雲山白悠悠雲雁聲令嚴鐵衣冷雄劍動光精男兒生盛世有身當奉君但謂奇兵出邊塵日可清何知沙漠迥白首未成名

丈夫英烈志充塞天地中言行務挺拔羞與世雷同則行吾道不用歸固窮寧為祝鮀佞以自屈其躬依山

結草屋畊釣學三農野水魚蝦盛石田禾黍豐高歌養
時晦不愧古人風

窮達付天命胡宜心苦憂玄穹馳兩曜羣動不能休風
霜逼歲杪感化生遲留汲汲者誰子走馬出南州路逢
徒步友相喚不回頭意氣可時羨功名那未收古來豪
俠地惟見水東流

朝看上林花夕飲長安酒酒酣發浩思舉觴復停手萬
化出堪輿禍利何紛蹂達人會元命進退惟貞守云胡

儀秦輩危邦日奔走大道既不行取遇資辨口地下會相逢寧無慚泄柳

西行一萬里郡國何遙遙馬鳴寒日暮始至咸陽橋渭水自縈帶函關空寂寥秦家故宮闕離離惟黍苗漢陵松與柏枝幹半成樵草間兩翁仲似欲語前朝廢興雖定理遺跡幾時消

中古漢而下為國少足珍唐宋肇大業所貴亦以仁魏晉更竊取禮樂俱無倫我皇撫大運有位以得民龍飛

應九五天地感陽春德化慕初古風俗盡還醇終當億
萬世軌範希聖神

孤鳳日空谷羣龍已滿朝濟濟論大道何君不舜堯九
衢凌禁籞萬井寂春宵旗旌隱閭闔鐘鼓轉招搖雞鳴
長樂曙珂珮響雲霄披誠謁明主天鑒亦非遙願言光
聖化亘古聰節韶

大賢始未達蘊德恒若愚一朝離草野虎變驚寰區祿
位極卿相勛業應都俞云何渭川叟獲載周王車云何

陽武士得替漢皇圖當其囊括時舉於衆不如飛騰在
頃刻四海謾嗟吁

浮雲蔽天日游子何時歸關隴無窮極北風始寒威荒
城饒古木落葉隨人飛昔別期半載三秋音信稀何如
比翼鳥何如連理枝同生亦同死終始得相依感之益
惆悵涕淚滿裳衣

人生如夢泡憂樂無定端歸休常未久別去每漫漫雲
平雨雪暗陰盛北風寒君今在萬里言念衣裳單光景

亦何速曾不比奔湍安貞信為古古道良獨難幽憤積
中曲無言坐長歎

萋萋南澗草灼灼東園花豈不念容色獨奈景光何昨
日日苦短今日日復斜青陽坐遲暮為樂何蹉跎李膺
匪名士石崇豈豪家得失更相酌盛衰遞來過寧不知
至理悲悔徒自多

前有三十年強半向蒙童後有三十年強半已老翁少
壯幾何時榮辱在其中苟於志弗立徒爾榮厥躬世治

貴行道世亂尚高風
顏子在陋巷一瓢常固窮而不改
其樂賢哉疇與同

出門省時物薄言向東郊
秋風入灌木百鳥為悲號復
見孤飛鶴唳繞長林梢傳書
亘遼海羽翮無乃勞於焉
思一息而奈失其曹
鷗臯上翔集狼虎下咆哮
飄然載高舉人間那可巢

悠悠世間事得失何定期
貴富信匪榮祇自取驅馳苟
違取舍機幾不取傾危君看
石崇宅金壁爛光輝始謂

可千歲禍乃不移時慢藏祗誨盜聖言豈我欺咽絕無
復續雖悔其何追

去日復來日光陰苦相催十里復萬里世道何悠哉古
人已不復今人徒自哀甲第變畊隴荒墟且崇臺興廢
在眼前惻然感我懷千名羞苟進著業乏長材惟酒可
托興焉得日銜杯

昨日見君情不殊弟與兄今日見君情不殊岐路人其
故為何歟無乃有衰榮蘇秦未得志婁嫂亦相輕買臣

既貴遇愚婦悔何勝交態亦如此翟公昔署門邈哉管
鮑道千古疇能并

遲遲三春日照耀綺羅園園中松柏姿何如桃李妍惟
見東家婦采花時笑喧妄非以離恨稟性惡其然但願
君早歸白首共周旋桃李任衰榮松柏且孤堅

海水浚不測關山高不逾君去日已遠妾在當何如風
煙眇吳越徒此長嗟吁所願山可摧復願海可枯山摧
為平地海枯成坦途萬里無寸險一日可回車

登山采靈艸悠悠念長生長生不可念且遂探芳行曠
哉秦臺子雙聲調玉笙清商汎穹昊鸞鳳感和鳴倏爾
凌空去眇若秋雲輕徒令企望者蒼然熱五情世間榮
辱夢終古未應醒

違世慕真境洗心謁名山數峰稍前入斗已失人間珠
泉激瓊礪碧殿照瑤關松桂更無古鸞鶴不勝閒仙人
長笑出握手話金丹谷神期不死鉛汞任循環願言就
茲隱千載駐紅顏

寓言

陰陽分晝夜輪運浩無窮時物更代謝孰知玄化工人
生如夢寐即寤永成空幽觀衰榮朕往復邁旋蓬鄙夫
昧達識眇然隨所終賢豪關世運用舍合中庸進由吾
大道退屬吾清風載歌紫芝曲不愧商山公

結交

搽交若松柏嚴霜無改顏良交尚胥益薰襲逾芝蘭時
交桃李容朝結暮摧殘又如淵澤靜一激興波瀾交情

貴有常固結豈誠難道同心亦合弗在多誓言苟非盛
德士反側須臾間

感遇三首

吟詩愛千章靡益于世道是則徒爾為雖多胡足寶譬
入東風林炫目多花草容媚可人怡飢至莫余飽曷若
事西疇省彼粱與稻實為卒歲憑永焉天命保

登山慮其高涉水憂其深獨於處世人而弗度其心其
心一弗度言貌終難謀反是曷謂智徒多咨陸沈盍聞

方寸同厥利猶斷金此正彼無邪讒毀孰余侵

服牛待余耕乘馬待余行蚩蚩乘且服驅策不少仁安
知有血氣何獨能無情所以異貴賤由人為物靈資用
竭其力可不見推恩嗟彼殘忍徒戕之如折莖

詠林居散生

隱山不在深情高喧自寂交友不在和誼合疎自密世
人多巧智動靜恒匪然末榮本不滋曷免終摧顛惟君
拔俗流於余寔同調惟余好斯人於君亦知要白雲陰

松石寒泉漱庭除匡坐論太古方寸擬堪與萬里出從
中舒卷俱自得山重非可移淵浚宜莫測清風千萬古濁
酒三五杯彈詠續歡洽浮名何有哉琴以揚徽音詩以
發素抱願言永陶陶窮通付穹昊

憶王兄韶

茼茼庭際陰煒煒松下花松姿固自持花艷終可嗟徒
令益幽思於是感年華年華從何逝長見白日斜君子
抱古道屏居河水涯累月莫予邁人生終幾何脂彼檀

木車秣此黎眉駟所願憂懷寫無論途路賒

憶贈遊子哲

晨興振煩襟悵言臨清河俯視河水流去去無回波人
生如夢寐得失常苦多潛鱗思淮淵翔鳥戀故柯維物
知所止獨奈世人何君為巢由隱洗耳矢靡他養道日
游詠考槃云在阿白雲長共棲紫芝時復歌願言往從
君吁嗟乎蹉跎

夏夜有懷王兄學

明月何燭燭良夜亦悠悠攬衣歷前除閒詠以銷憂俯
褰幽蘭芳仰視天漢流鶉火司夏令玉衡指炎州感茲
氣象易念彼平生儔山高而水深于焉成阻脩嘉會邈
難卽何以結綢繆陰陽無停機榮枯遞相酬百年苦短
短況若參辰游美酒聊足揮丹經安可求願君固貞節
歲寒保康休終朝拾瑤草三山尋十洲

秋夜有懷武陵舊友

片雲停西南下與山翠接寤言同心人於此三歲別道

路阻且長何時見顏色
我有枯桐琴朱絃久徒設欲為
孤鸞操中內增永結思將持贈君千里非易越悠哉清
秋夕不忍對明月

枕上憶禮用黃文學

旅枕春夜長雨聲繞松屋
窗虛羅幌寂輕颿動餘燭展
轉寐不成幽思溢中曲嗟彼同心人言貌溫且淑別茲
良已久懽晤靡可復迢迢雲山青沈沈江水綠握手當
何時還來盡忠告

田家秋日

衡門逼幽蹊曲巷通極浦十家兩三姓世世相托處舉
目皆累姻出入無齟齬男為東舍郎女作西鄰婦寒風
及秋社豚酒酬田祖老巫燒紙錢穉子喧銅鼓漠漠柘
園煙紛紛芋田雨歸來肆筵席半醉相爾汝王租既蠲免
官事亦有數且願日昇平皞皞如太古

已未九月余新歸灘江度構茅居甫成姻兄王氏
效先有詩見美倚歌和之以酌其深意云

周孔既已矣哲人將疇歸萬物自榮謝蒼蒼含朝暉結
廬還故里忍使初心違為山期九仞履實功寧虧載歌
太古音泠泠空自知

又

聖人百世上我乃百世下攘攘塵途間未有忘情者淫
詞尚新聲薄俗輕大雅明珠混魚目疇能別真假結廬
隱其身翛然傍林野

城南小隱

萬冗作由心心遠喧竟寂孰云事真隱而必離塵邑惟
茲方寸中渾然有太極衆人固蚩蚩悟之在達識卓彼
高世士抱道慕閒逸舊宅城南隅處甚岩岫僻曠哉煙
霞想變化隨所即礪齒何不堅循壁亦有石洗耳何不
清負郭亦有澤寤言宇宙間焉往不自適溯觀巢許流
千載猶一日

古松吟

道周古松樹半榮半已枯長絲斂柯葉流膏出皮膚旁

見斤斧痕文理爛交數歷歲豈不深養質心匪虛孰俾
夜焚之光輝發烜如致民思利用斬鑿及根株疑疑中
澤棘苑苑高林樗非材衆所棄生意迺有餘反嗤爾為
松憔悴獨何歟

感懷三首

芳桃笑春風穠李耀晴日偶蒙化工榮光彩不可敵盛
時能幾許零落各相失詎知寒松心凌霜如鐵石

周旦匡王室而惟管蔡謗不資穹鑒明聖德幾淪喪二

年罪斯得雷風感天象懷哉時世遠光澤不可望
皇天沈以穹后土漠以廣善惡雖萬殊報施終不爽大
人知至道日鑒于既往嗟彼盲瞶徒逐物空鞅掌

靜夜思

天地同逆旅春秋比流波昨昔樂苦少今茲憂復多
人而離居其如良夜何良夜殊未央悵言臨中堂
鼓蘭泣零露初月揚清光我有枯桐琴爰以托遠心
哀絃徒激烈愁絕無知音太行豈不高黃河豈不深
夢魂終不

隔萬里還相尋

懷遠有作

流離悲夜闌月隕山正黑幽閨破殘夢歎枕益悽惻同
心與我違九載燕趙客大車即長道利往不改轍人世
如蜉蝣變化曾倏忽何有龜鶴齡而耐此遐別願言勿
復思思之淚成血

春日言志

晴光灌榮樹好鳥鳴其間幽人啓前戶盼之以怡顏樹

色正蔥蘢鳥聲何綿蠻物情本自適於時亦相關乾坤
同大塊寒暑交循環變化豈終極枯榮倏往還云胡百
年內不有一日閒智哉張子房功成遠所患寒流松石
上辟穀聽潺湲

種樹詩

生有種樹癖性稟由孩提五歲藝菽麥幪幪輒成畦七
歲讀書暇封植靡他為九歲已悟達益諳相土宜百穀
暨蔬果根莖日敷移行年十三四把筆耽文詞朝誦索

駝傳夕歌生民詩始祖出姜嫄艱食肇播施奄然即邵
室德教萬古垂嗟哉丁未裔心好同規規欣逢堯舜君
委身常恐遲中原遇龔遂與爾爭先馳

華蓋山

廬陵

東風吹大河河水為上湧緬思華蓋君巢雲絕塵冗嗟
時月滿軒耕處雲生隴何當命中車相從服鉛汞

黃麻峽

安城

遠聞黃麻峽自邗行及酉溪聲咽復喧山勢回不走居

民實醇朴安用巡徼守男耕而女織帝力亦何有

梅花源

廬陵

山行五六里峰勢忽亂巘前有梅花源人煙帶丘隴天
寒雲木交畫晦風水湧近聞豺虎多深入能勿恐

夏莊里

龍泉

山行巖險極言至夏莊里俯視見人煙直下在地底結
屋自為鄰開門齊向水嘗披桃源圖何有踰乎此

花陵渡

泰和

路窮春江長江上花陵渡東風桃李花多少隨流去野
航容數客來往衝紅雨日夕望煙波武陵更何處

武婆岡

泰和

處女桃花顏自幼謝塵匹飄然入茲山燒丹學仙術乘
雲以何代留名至今日徒令凡世人千秋指遺跡

大平洲

泰和

一水分復合是有中流渚溯洄從其人道阻心良苦其
人美如玉遠世甘獨處秋風把釣歸遶屋松蘿雨

黃衣岩

泰和

崇峰出百里岩壁亦何峭神功肇元氣中有太古竅青雲從下起白日當前照仙鶴不重來年年野花笑

尖心峰

泰和

東郡富原田西顧曠平永青峰特中起卓立勢拔笋造化固根荄陰陽定標準何當躡層雲臨覽至絕頂

大石門

泰和

兩山夾長溪石壁忽觝截一竅正中開巔岼象振闌不

假造化功世人焉得設萬古祇如斯消磨幾行客

釣魚臺

廬陵

仙人何代飛空有垂綸所危磯枕中澤形勝猶太古奔
流怒出峽衆嶽欣承宇悵望嚴子陵山秋紫蘿雨

鷓鴣港

廬陵

十家同一姓浮處依巨港取魚以為活鷓鴣代畧網田
園世外疎兒孫眼前長何當命輕舸煙波共長往

白水湖

廬陵

平湖淨如練光氣日舒卷秋水荷花鮮西風棹歌遠美人居上頭游子無時返行見紫鴛鴦惆悵天涯晚

白下縣

秦和縣古名

大河東遙遙孤城忽如塊臨流起層閣危軒俯長瀨西山當倚晴宛若蛾眉對日夕望闌都車馬空橫潰

送胡生歸秦川

別我胡草草送君良遲遲車膏馬既秣不得留金羈楚水涉今日秦川到何時天涯欲相見惟有夢魂來

送吳撫遠游

南州有一士高視絕今古
被服千金裘驍騰五花馬
方當客吳越復欲游梁楚
天地入浩歌安知行路苦

夏夜詠懷

蘿月白於練松風涼於水
幽人感芳序攬衣中夜起
天河向西注斗柄當南指
流螢輕入幔啼蛩亂喧耳
寂寂愜深情悠悠思至理
兩儀立四極萬物遞終始
金石有銷鑠人壽安足恃
動靜榮辱隨存亡哀樂繼
所以達識

人用舍由行止居偏俗事稀魚肥新酒美酒酣發浩歌
響徹青雲裡正命托堪輿何樂可代此

過友人墓

天地育羣物衰榮迭新故苟非金石資疇能保晨暮水
逝不復西葉凋長辭樹昨日眼中人今朝隴頭墓永寐
長夜臺無時見明曙感此心悲傷彷徨以懷顧彭殤均
朽化何術可獨固吾將營姽女九轉童顏駐鼎湖有飛
龍乘之上升去願從軒轅游復與王喬遇呼吸元和精

服餌玄牝素萬期為須臾八荒等庭戶俯視閭門間茫茫日塵霧

贈王兄學

人意自南北豈在山與水苟非道誼合對面若萬里嫩人賦考槃于彼河之渙作疎動旬朔音問苦不至白露結為霜百草中夜死楚郊鳴寒鴈蕭蕭無停翅日月忽居諸人生倏如寄感茲氣候易耿耿懷宿契荒哉雞壇盟反顧惟隕泪輕薄寒路衢奔驅競微利變態須臾間禽

獸安所異君子德義敦中路忍忽廢願言最始終相善
以沒世毋為投井心下石速其斃載歌伐木篇書以謝
知已

幽居對雨獨酌

幽居一日雨高坐不出門江風逾箭疾隴雲仍墨屯驚
魚晚時躍樓鳥寒不喧發我封菲苗滋我松竹根靜言
觀物理生意何其繁家人慰沈默洗杓開小樽斟酌勸
飲之兀然醉乾坤塵土彼塵土得失焉足論

清夜思

迢迢清秋夕悠悠千里思
嫩人一為別邂逅官難期
月滿寒露零驚鳥號南枝
空庭耿無寐輕颿入羅幃
感茲益惆悵人生能幾時
離多而會少胡然心不悲
安得臨風翼歛忽相追隨

芻蕘集卷一

欽定四庫全書

芻蕘集卷二

明 周是修 撰

七言古詩

長安古意

長安二月三月時
千門萬戶春風吹
綺構瑤臺相照耀
香車寶馬並驅馳
驅馳照耀皆豪貴
九棘三槐夾三市
鼎食鐘鳴將相家
朱簾繡柱王侯第
王孫公子盛繁華

山珍海錯棄泥沙銀鞍斜度官溝柳丹轂橫移御苑花
花歌柳艷春明媚嬌鳥亂啼花雨細瑤宮錦殿傍雲開
鼉鼓龍簫震天起美人內屋艷神仙鉛華炫轉春爭妍
熒熒珠屏交綵幄隱隱羅幃分玳筵蘭釭桂酒芬芳發
象筯瑤杯光彩徹翠釜金罍不暫停雕盤玉盃紛成列
迴瞻複道接飛甍都城佳氣正氤氲雙龍絳闕凌青漢
九鳳紅樓瞰紫雲紫雲翠霧碧煙空文窓藻檻何玲瓏
流鶯獨繞昭陽殿芳草深迷長樂宮漢代中興富名將

百戰功成心益壯閒來賭酒千僕姑意氣相排不相讓
半酣徑上寶釵樓赤闌四面俯皇州一羣粉黛成歌舞
千種風流生勸酬樓前兩兩鴛鴦度樓下雙雙鳳凰舉
鳴璫背解玉纖輕弄色凝情羞不語就中心思可誰同
平明扶上玉花駝自言百世無衰老自謂千載長英雄
可怜光景留難住秋風一夕生庭樹歌亭寂寞荒草寒
舞榭蕭條殘葉暮昨日紅顏美少年今朝潦倒那須數
將軍舍外無人過廷尉門首堪崔羅吁嗟盛時不復作

金莖銅狄隨消磨君不見廣成山中白雲宿安期海上
顏如玉軒轅已駕鼎湖龍漢武終歸茂陵麓別來倏忽
三十年海水幾變桑田綠

塞上曲

北風獵獵衰草黃邊馬壯健邊人強馬嘶風勁角弓響
射斷天邊鴻鴈行驚沙亂起愁雲變人馬相聞不相見
單于夜半未歸庭昭君空抱琵琶怨淚雨濕花香滿面

塞下曲

十月祈連三尺雪孤軍萬里防邊敵鼓鉦不動馬停嘶
北風吹凍衣裳裂元戎怒奮黃金戈夜移苦戰臨交河
海雲漠漠關月黑道傍死骨何其多主恩未報將奈何

紫騮馬

紫騮馬黃金韉一新剪拂當晴天蹄輕耳峻筋骨堅性
烈不受庸人牽山西主將功名老時時騎出長安道長
安三月春風寒無限落花點芳草遙遙數里聞號鳴走
過一歛疑流星汗生黑暈搏雲濕舉國驚駘空震驚歸

來四海知聲價甘將伏櫪都城下回看厭旦可不慚苦
月寒霜自終夜

公無渡河

太行之山高莫比黃河之水深無底山高無路猶可登
水深無船安可行公乎公乎奈爾何被髮提壺來渡河
河水深不可渡公無渡河渡河去長風吹天落日孤狂
夫烈女何代無願死從公與公俱箠篴所悲終何如

莫愁樂

石城城下春江流，城邊十二紅粉樓。
吳兒打槳動晴綠，送妾隨君樓上樓。
為君起趙舞，為君發齊謳。
舉酒勸君君莫愁，妾貌強如花，妾心強如月。
花盛有時衰，月圓有時缺。
勸君莫惜千黃金，趁取青春好時節。
為樂須臾誠可憐，人生安得長少年。
雲收雨散不終夕，落花飛絮春風顛。

將進酒

將進酒，黃金鍾，佳賓如仙馬，如龍璫。
樓綺席，凌煙空，一

聲浩笑勸相逢江南二月皆春風擊鼓催花花盡紅人
生在世偶然事對此不飲將安從發齊歌引趙舞利路
名場付何處出令傳觴急飛羽請君為我縱鯨吞不醉
不顏不歸去青山在地日在天山翁倒載車底眠但令
行樂長若然浮雲富貴安足言

遠別意

遠別離楚水深吳山高吳山迢迢起煙霧楚水浩浩生
波濤君今天南妾天北欲往相從安可得終朝不見若為

情況是頻年音信絕孤房獨宿耿無寐夢中恍惚平生
意羅幃翠被暖香殘珠箔銀屏夜燈細遠別離相思唯
有空中雲時時千里能隨君相思唯有雲間月夜夜千
里能照妾妾看雲月長躊躇君看雲月還何如

商婦怨

作木莫作桑樹枝作女莫作商人妻桑枝歲歲苦攀折
商婦年年感離別桑枝折盡猶解抽人老豈有重蒼頭
神龍猛虎會可執其奈夫婿心難留朔風吹江浪如屋

柁樓嘈嘈行色促望殺蒼天哀憤深目斷雲山淚成掬
何能化作檣頭燕到處飛飛得相見何能化作帆上風
千里萬里長相從父母嫁我非夙契但云商人多贏利
門前宴集廣輿馬筐筐聘來足珠翠豈知今日成參商
輿馬珠翠看無光月懸別恨秋宵永花攪離思春晝長
妾心豈學道傍柳朝朝暮暮千人手妾心豈學空中雲
變易隨時何有情妾心可似南山石雨打霜侵只如昔
更看終歲不歸來化作南山一拳石

漁郎謠

漁郎住在雙江口家養鷓鴣十八九唱歌打漿落長潭
大魚上船小魚走四時坐計水中央百藝何如網罟強
岩上拾薪岩下宿不識耕桑衣食足回頭萬事等浮萍
雲白山青沙草綠短蓑開合幾晴陰閒來沽酒杏花村
載歌一曲滄浪晚棹入烟波何處尋

酒家謠

江口一樹芙蓉花花下吳姬沽酒家井頭轆轤五更響

門前便有人來往酒味雖漓衆稱好一日常傾百壺早
年來運去錢米缺沽酒實醇人不說門前冷落秋草生
萬事蕭條不稱情人情反覆何能定莫怨他人由汝命
朝朝江口望行人但見寒江白沙淨

牧童謠

遠牧牛朝出東溪溪上頭溪頭草短牛不住直過水南
芳草洲脫衣渡水隨牛去黃蘆颯颯風和雨老鴉亂啼
野羊走絕谷無人驚四顧寒藤枯木暮山蒼同伴相呼

歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一卧午風輕長笛三吹
夕陽早

樵夫謠

樵夫採樵樂有餘數家茅屋深林居朝朝磨斧礪底石
牽蘿直上青山隅愛斫蒼枝桂愛伐枯死樗眼前取足
隨所如東擔不歸就向城賣錢糴米養慈親慈親在堂
乞長健年年賣薪奉餘羨但願身安口得充免因賦役

走西東昨朝富貴千鍾祿今日雲南親種粟

田夫謠

田夫住東鄉今年八十強兒孫滿屋足指使老病常時
臥在牀戒兒早納官家稅莫學庸頑事推避官家稅了
即身輕歸來努力復經營生計隨時不願豐但願千載
無戈兵不思往前離亂日有米作糜不得食出門亡命
走烟塵骨肉回頭各相失只今雖貧何可恨天地生人
要安分風調雨順禾米熟盡納官家心亦足

桑婦謠

採桑婦朝朝暮暮南園路出入寧論晴與雨蠶盛愁桑
稀蠶衰恐姑怒太眠起來忙更忙寢食不遑兒不顧年
年養蠶多繭絲身上到頭無一縷小半輸官大半賣繅
織未成先有主可怜寸寸手中過竟作何人襖衫去采
盡桑葉空留樹樹下青青長麻苧山雞角角終日啼桑
堪漸紅春雨住安尚無襦夫少袴事事令人亂心緒嗚
呼人家生男復生女生男猶得傳門戶生女徒多累父

母若兼長大嫁貧家不似生時棄塵土君不聞采桑婦
瞿塘賈

瞿塘賈前年二月離鄉去去時許妾半年歸指定桃花
成誓語桃花三度謝還開望斷天涯不見來相思未惜
容顏老但恐君心不長好君心重利豈重情有錢何處
不榮身花落黃昏風雨急獨掩重門愁殺人

臨川女

臨川女日日臨川望何處臨川路前月征人從此去征

人此去九千里持戈遠赴交河戍交河沙塞宿茫茫盡
是古來爭戰場白骨連山中夜月鐵衣倚馬五更霜此
時王事好辛苦將軍號令嚴如虎一聲敵騎寇邊州生
死向前無轉頭丈夫重義輕生死動肯捐軀報天子妾
在深閨君在邊何當破敵遂生還但令百歲能相見離
別尋常安足怨

白楊花

白楊花何紛紛是誰種汝當墓門墓經盜發無所有但

有朽骨猶縱橫昔為將相公侯貴今成無主同孤魂萬
家第宅人如霧盡如他塋之子孫斷碑芳草何年代寒
鴉流水幾黃昏君不見百川沸騰山塚崩高岸為谷谷
為陵又不見五陵松柏無餘根玉魚金盃人間行古墓
適存何足恨猶勝平除作地畊

歸寧婦歸

門前石橋路東去何悠長妾從此路嫁他方還從此路
歸故鄉竭來別郎五六月朝夕不離慈母傍月滿西堂

夜未央烏啼金井梧桐黃此時與郎惜景光獨守羅幃
愁斷腸忽向樓前聽嘶馬報郎迎妾將同行慈母許辭
親為妝膏車秣馬當晨霜母恩亦如郎愛厚妾心懷母
若懷郎但願母壽郎安康歲歲與郎登母堂

姑惡鳥

有鳥有鳥終日啼萬口千聲如一詞云是悍婦怨姑惡
精魂幻化之所為我聽此言重惆悵惆悵思之誰是非
人家生男願取婦取婦願能纂家務自古物從勤上生

詎容怠惰無思慮姑詈汝願汝勤姑撻汝願汝能汝改
姑欣欣不改姑難平如何重恩愛翻化深憤嗔殞身化
鳥道姑惡孫孫子子傳怨聲古有孝婦塚亦有義女亭
至今人嘆慕至今人頌稱汝言姑惡姑不惡自此吞聲
休更鳴

張子房歌

漢家重器張子房起身報仇來博浪金槌一揮祖龍怒
四海驚濤隨播揚忽遇山東隆準公契合君臣魚水同

當年不取下邳履豈有神策先羣雄蕭曹忠貞平勃智
信越武威樊紀義蛟騰虎變各英豪復搃機謨歸掌指
滅霸成王建業秋元功茅土遂封留固知富貴非可久
便逐喬松仙者遊丹經洞府閒終日雲白山青江水碧
回頭世事等浮萍梁楚他年血波赤

朝霞歌

朝霞擁晴迎太陽滿空炫轉朱火揚鳳綵龍文結縹緲
歛忽變化神靈張始疑天孫織錦過七襄百花就剪將

縫裳精光倏爍帝為喜命呈下土旌成章又疑女媧鍊
石初得方功肇洪爐開混茫火精水銀出鑄冶金花五
色填寫蒼玉京瑤臺如帝鄉道德君王同紫皇閭闔九
門闕蕩蕩文武千官鴻鴈行時和氣應羣物育從茲袞
袞來禎祥載觀卿雲歌八荒

秋思歌

明月明月照我庭晴光作雲翳寒星夜寂寂今天冥冥
草木淒兮霜露零懷帝子兮湘水濱哀窈窕兮傷娉婷

啟珠箔兮開銀屏
凝幽思兮發遐征
秋風高兮鸞鳳鳴
莫往從之兮淚縱橫
水冷冷兮山青青

又

清風清風吹我裳
飄飄羽翠隨飛揚
秋寂歷兮夜悠長
水無聲兮山蒼蒼
指佳人兮北斗傍
聽玉珮兮鳴鏘鏘
玄霜墜兮金屋涼
綵雲結兮羅幃香
神忽來兮忽已往
莫往從之兮空斷腸
記年歲兮安可忘

達懷歌

天下萬事如浮雲倏忽變化不可測鸞鳳終非枳棘棲
蛟龍曾是池中物君不見孔明南陽卧安石東山遊三
顧幡然魚水合七辟始為蒼生憂大賢抱材思濟世時
止時行付天意區區取譽焉足論長笑望塵潘氏子古
今興廢兩悠悠聲利難將屈已求且唱樽前三五曲都
消心上百千愁

君不聞歌

君不聞和氏璧楚王刖之以為石又不聞豐城劍千載

埋藏遇華煥世間萬事有窮通何況壯士誇材雄於時
未際君且守春到花開不須久

一壺酒歌

一壺之酒三四客閣暖爐紅窓月白圍爐把酒且飲之
須臾相顧皆春色酒亦何美意何長人生百年內嘉會
不可常且樂今夕同徜徉飛霜落盡衡陽樹哀鴻叫下
瀟湘瀟湘湘浦九疑雲隔蒼梧路帝子香魂招不來空
餘竹上啼痕處放歌一曲壯心悲天涯漂泊我何為明

當徑度禾川水却望廬陵山翠歸

浩浩歌

君莫欺貧賤兒陋巷陳平終帝師君莫誇富豪子銅山
鄧通終餓死世間萬事如轉燭明日升沈安可卜請君
聽我浩浩歌古往今來情奈何春花片時忽如霰旱雨
一夕翻成河枯榮否泰更相代天運循環理無怪君看
梓澤與梁園空餘野草荒烟在荒烟野草昔寥寥還見
樓臺凌碧霄眼前興廢盡如此且飲美酒令愁消

懷友歌

吁嗟友道日凋喪眼底輕薄徒紛紜朝為同心暮楚越
倏忽變化如秋雲我思安得齊鮑子相與平生獨知己
斯人易失難再求恨殺重泉呼不起光陰百年亦草草
少壯幾年復衰老鸞鳳哀叫失其羣嘆息無言望空昊

花酒曲

花初開酒初熟花正紅時酒還綠采花的酒向東風二
八童顏美如玉花蕊嫩堪怜酒星長在天喜逢春未晚

況當人少年春光人事相周旋願從花裏宿愛就酒中
眠窮通榮辱付高天如何不樂心懸懸莫厭酒杯深須
趁花枝好春光解去人解老明朝急雨醉醒來滿地殘
紅亂芳草

花蝶詞

蝴蝶飛飛桃李蹊有生都只被花迷生為花忙死則已
花蝶兩情無可比一朝花謝蝶何之別戀新紅嫩白枝
向來生死迷心處顛倒莓苔總不知眼前世事皆如此

親疎離合為時使相如得志棄文君比翼愁成中路分
茂陵一聘心已改短嘆長嗟耳不聞程公富貴多賓客
濟濟賢材論忠節盛時忽變散如雲門外還堪崔羅設
我歌花蝶情難了窮達相依古來少遼哉鮑叔與宋弘
萬載千秋名皎皎

石仲歌

前朝古墓青山隈石仲屹立經幾秋龍摧龜斷蚪蚪折
馬仆麟僵鸞鶴裂獨爾形容得苟完無乃年深化靈物

知是誰家顯祖宗子孫零落各西東清明寒食宵不至
空有狐兔巢其中石仲淒涼何足道金莖銅狄餘烟草
恹夢罔雨自為隣雪霜滿頭天地老

柳條長

柳條長柳條長三尺溪水黃雨晴布穀啼欲死村中老
父心徒忙心徒忙事難了大兒當官少兒小府縣公文
迭迭催吏胥晨夜何紛擾雞豚殺盡無毛餘杯盤稍薄
即喧呼雲南逃卒計千百星火捕獲私相圖同名共姓

隨地有掩襲成擒不鬆手爺娘陷絕妻子離負戈萬里
遙奔走姻鄰哀送擁道傍泪滿春衣空斷腸叮嚀異境
好將息留取眼睛歸故鄉故鄉田土今誰種堂上雙親
復誰奉皇朝奮武誓開邊邊塵未淨兵猶用高歌一曲
柳條長壯士由來志四方會看三箭天山定從此化為
侯與王聚散尋常安足傷

種粟謠

鄭州民稠田不足生計家家只耕陸歲饑麻豆不堪充

小戶年來多種粟，粟苗幪幪過人長。粟葉青青粟穗黃，
老妻稚子欣欣喜，晚摘成筐夜舂米入厨炊飯滑且香。
自說無如種粟強，鄉村米價日騰湧。我粟如茨被丘隴，
世間百事撻艱辛。到底勤耕不悞人，一粒落地萬倍利。
消得幾何納官稅，惰農好食如狼虎。奔走長年離鄉土，
良田繞屋不勤耕。怨天只恐謀生苦，豈知世物隨人轉。
得失眼前人不見，愚痴可笑亦可憐。作詩徑為惰農

勸

次韻龍維周金陵出塞

君不見上國都門道如砥九棘三槐夾三市又不見金
戈鐵馬陣雲浮拜命安邊辭御樓車聲連營若雷動絃
管啁啾發伶從中天月色鐵衣明半夜霜花隼旂凍漠
南塞北無王庭蛇豕縱兇何足平況今天子能得士百
萬驍騰皆俊英鳳闕龍城分虎衛武備頻年蓄精銳閭
外同推太尉賢府中只數元戎貴鍾山走勢橫千霜金
陵佳氣成九章運籌帷幄佐明主似有漢代韓張良羽

書昨日徵邊戍百里旌旗蔽烟渚雄心一片獨飛揚要
斬樓蘭斷歸路賀蘭山下寂無人龍鱗水上且孤軍丈
夫生死向前去豈復回頭懷所親錦機漫織回文字離
情不奪英雄志會須三箭定天山青史功臣當鉞梓黃
塵大漠渺茫茫却望君門天一方邊庭早晚應奏捷獻
凱歸來朝未央

青山高

青山高白雲深君不來傷我心青山高白雲長君不來

斷我腸斷我腸在何許洞庭之下瀟湘浦昨夜瑤琴一曲中輾轉離鸞為君苦復對青山歌白雲千里萬里遙思君遙思君君不知遙思君無已時青山自青雲自白天地悠悠自南北

寄贈巫陽隱者歌

金樽美酒清且香欲飲不飲愁心長寒雲四塞南鴈翔尺書不到巫山陽巫山十二峰巒出落日平荒楚天碧嵐烟瀑水石橋晴啼鳥梅花野亭夕野亭夕秋風多亭

西隱者今如何欲知別後相思意不盡東流江上波

畫龍歌

雲如車輪風如馬雷鼓砰訇電旗參其中踴躍何爾為
無乃蜿蜒作霖者古來善畫此者誰葉翁所貌稱最奇
筆端揮灑絕相似亦有風雲雷電隨大梁徐公生卓犖
十上引錐稱好學揮毫洒墨運天機鬼泣神愁日光薄
斯須縞素騰真龍斧蒼蒼直奪造化工恍如列缺引霹靂
歛若巽二驅豐隆枯木槎牙頭角露鱗拂雪花駭成怒

劃然威掣海門開，勁望層空欲飛去。我時見畫心膽豪，
拔劍起舞翻絨袍。波濤萬頃東溟濶，瘴烟千丈南衡高。
嗟哉徐公天相爾，後恐無繼前無比。酒酣神氣益洒然，
白日風雲牕戶起。為君一作畫龍歌，高風激烈雲差戾。
魚蝦混處不可久，龍兮龍兮奈爾何。

武山

武山山勢凌雲雄，當南突出虎鼻峯。峯頭直上九千丈，
翠光倒削玉芙蓉。飛湍瀑流掛絕壁，松檜龍鱗柯鐵屈。

就中樓閣開窗真風霆白晝驚霹靂紫虛真人華蓋仙
朱顏綠髮不笑言手持天關踏地軸服餌玄牝畊丹田
琪花瑤草時堪把紅塵誰是長年者猿鶴如能問道心
雲在山上水山下

南溪夜飲醉歌行

南溪之水清且甘釀酒飲少輒為酣君家今夜設華宴
明月正照山前庵佳人狎坐發清唱起舞牽衣不相放
錦袍無惜濕淋漓玉盞唯催氣豪宕峨嵋亭子今不存

習家池館亦無聞騎鯨倒載千古事此時之樂宜同論
人生嘉會難屢得且飲如澠對明月窮通於我果何哉
出門一笑天地濶

釣臺歌

一夕湘沅春水來浩浩蕩蕩無際涯手攜童冠二三子
直登落日釣魚臺釣臺之古清塵埃綠楊白石荒蒼苔
釣臺之幽散花竹斷崖絕壁何崔嵬風潭百頃魚龍走
海上萬疊烟雲開周宗相業嗟已矣漢代客星安在哉

空餘高隱垂綸處風帆沙鳥相遲徊渡頭人盡遙天暝
東山片月如飛鏡漁船浦嶼火初明僧寺林塘鐘已靜
長漠漠山雲浮長悠悠江水流人生幾何奈易老昨日
紅顏今白頭富亦不須樂貧亦不須憂道大小天地義
重輕王侯有酒即合就君飲飲即醉不醉至死不肯休
誰能更問名與利自今辜負釣臺遊

畫師謝公歌謝公檉州人畫極奇古且神速過人
因過東岳祠信手馳筆各得其度若不經於意者

擊節再四作歌贈之

檠州謝公真畫師筆端欲落風雨隨千奇萬怪出反掌
神驚鬼異不可知洪纖高下各變化澆淳遠邇分妍媸
去年許畫東岳祠祠前父老待多時祠中雪壁百餘堵
公來三日揮掃之丹青十分極竊窕水墨一半翻淋漓
山川屏障雜諸體文武殿陛森兩儀烏歸暮林花竹迴
龍在春空雷雨垂眼前庸史誇手段點染刻劃何蚩蚩
謝公不笑亦不欺彼自誓服徒傍窺謝公謝公善爾為

嗟爾髣髴行如絲閭閻瑣瑣安足事老大成名亦未遲
麒麟將相久湮沒盍往一拭英雄姿不然求賢急當世
忍使吾皇勞夢思請收縞素百千幅畫貌時髦獻丹墀

王氏江居席上醉歌行

王君家住河上頭河水八月清瀏瀏西風入林竹屋冷
蟬鳥雜鳴嫌不幽生平於我交最密儼然膠漆深相投
君常慕作泉石隱我亦好為山澤遊別來許久若數歲
一見輒復苦死留進我玉壺之芳醪饌我璧盤之珍羞

小兒進蔬果大兒參獻酬況有白髮親諧謔相綢繆於
此不醉將何求日高豪飲達半夜中天片月清輝流銀
河明滅北斗轉繁露欲墜勢煙收是時杯行已不記但
覺淋漓雲錦裘庾亮南樓非足擬山簡習池安得儔君
不見金谷園亂鴉芳草黃昏後綠珠紅粉千年愁又不
見朱雀門霜戈鐵馬坐無敵擒虎英雄今亦休不須富
貴勞所志且飲百斛寬煩憂

鍾小吏

忠臣必世有烈女何代無卓彼鍾小吏忠烈夫婦俱生
同室廬死同穴此心一誓永不渝奈何一朝遭喪亂六
合四海馳兵車湘南草賊威頗振湖廣舟師氣尤麓據
索陷吉旋破贛百官竄匿民剪屠驅令降服共剽劫軍
中指點煩所圖鍾文大罵惡賊怒肯將麟驥隨牛驢忠
肝義膽彌激烈賊乃甚怒剗其軀其妻見之亦號呼投
井長溺從其夫後來死者亦無數堅鋼直節誰能如我
朝開國天所命我皇建業地所扶大軍晝夜急西土神

收電掃不足除春風熙熙轉寒谷甘雨沛沛充旱墟危
者以安流者止唯有死者無由甦嗟哉鍾文不可得死
去當隨巡遠居傷哉其妻亦莫得列傳所載皆相逾借
令國史一遺落此人此死真何辜此人此死真何辜一
為鍾文歌只且奸諛比比穢青史可滅鍾文夫婦歟

早還鄉行

長安城南官道傍行人車馬何彭彭行人意氣何軒昂
雕鞍繡轂搖琳琅錦袍玉帶生輝光健奴咆哮如虎狼

報酬賈勇百不當短鎗長劍誇克強疾賢不學魯臧倉
持槌肯隨漢張良美妾娉婷雙鳳凰綺羅珠翠嬌殊妝
春風列座宴華堂吳歌楚舞勸清觴雪膚花貌斷人腸
結交豪俠輕侯王忽忽四海英聲揚天子召見入長楊
勅以紫綬懸金章與朕連兵平北方北方萬里天茫茫
嚴冬十月皆雪霜鵞鳥不飛馬傍徨承恩受服心惶惶
驅車三日抵漁陽漁陽鼙鼓振大荒分營遣將兵符藏
玉關祈連尚我疆黑山青海勞隄防夜隨烽火赴沙場

轉戰沙場夜未央
彗星當夕收精芒
匈奴殺戮犬與羊
血流漂杵屍成岡
傳道單于先買降
幕南塞北就平襄
獻凱歸來朝建章
建章春雨花煌煌
寵恩慰勞不可當
功與韓彭相頡頏
名同衛霍參翱翔
出入謀謨資廟廊
天下之人誰敢望
只今老大髮欲蒼
故山海角路遙長
便辭明主趣歸裝
直指衡岳逾瀟湘
公卿禮餞塞河梁
簫鼓哀吟心思傷
但覺雙輪起鏘鏘
鏘鏘是時九月天
氣涼西風拂拂吹
衣裳鴻鴈南飛亦
悽愴我不如之為
稻粱

誓尋三徑隱幽莊竹籬茅屋依山墻環堵樹之千樹桑
子孫世計斯為減秋露漙漙時菊芳黃雞肥來新酒香
醉歌一曲臨滄浪向之富貴今已忘豈知萬國如虞唐
功成不退終致殃丈夫有志固莫量用能與世掃粃糠
萬鍾之祿那保常不如謝官早還鄉

灘江隱者短歌行

美人家住灘江干石泉夏五生清寒楊柳千條堪繫馬
簷簷萬箇待樓鸞樓鸞繫馬陰陰裏疊嶂迴巒望中起

何似王維住輞川更勝陶潛歸栗里方今天子思隆平
絲綸屢下收羣英君胡不隨時變化肯抱長材甘賤貧
賤貧亦可甘富貴亦可為丈夫不用則已矣一用當為
天下奇伊尹躬耕太公釣商周之業非輕小即從苦旱
化甘霖四海蒼生都濟了賢豪舒卷豈尋常吾亦拂衣
可同調

題叢蘭

石巉巉兮水沄沄蘭蕤蕤兮揚清芬思塞芳兮以紉佩

贈天涯之夫君望夫君今不見見三湘之暮雲吁嗟乎
三湘之暮雲

孤梅

草綠繡兮以爭茂木蕊龍兮以可悅胡不與之同時以
敷榮兮而俟彼之色變而葉脫豈不畏夫風霜而有契
夫雪月于是以見爾之高潔吁嗟乎爾之高潔

二竹

望孤竹兮不見見夷齊之並佳節胡勁而不屈兮性胡

質而不華睨首陽之高潔吾不知其竹之猶夷齊者耶
夷齊之猶竹者耶吁嗟乎其一者耶

臨清軒歌

君不見北風倒吹海水竭紇千山頭丈深雪萬石英雄
安在哉唯有連山之戰骨又不見富貴金堦白玉堂美
人如花珠黛香枯榮倏忽譚舞散落日野草啼寒壁君
家嚴親大人行壯節生平足豪宕築室雲林深復深冷
眼紅塵看得喪向南別起臨清軒軒前一水泠泠然上

映龍門之佳氣下引金洞之長源仰岡嵯峨倚天碧四
世家庭好承襲夜榻歌詩幼子賢春槽壓酒佳賓集桃
杏花間聞馬嘶不知何處醉還歸嬌孫出迎拍雙手明
月在地風生衣泠泠流水蒼蒼樹十載重來嗟物故有
子繼述孫貽謀勝槩軒中宛前度前度軒中勝槩多賦
詩具若臨清河請君酌我一斗酒為君寫作臨清歌我
歌臨清何以哉聊和陶潛歸去來軒中日日人長樂軒
外年年花自開

莫公畫角鷹搏雄圖歌

莫公畫鷹如掃字顛倒貌出天然似側目睚眦怕殺人
利爪生拏樹枝死朔風蕭蕭吹石林寒天鳥雀寂無音
饑來三日不飽肉黯慘一片英雄心狐潛兔走山鬼訝
四顧欲下而不下夕陽沉地暮霞明度盡原頭采樵者
斧間雄雉何得知載飛載雉求其雌竦身奮起過電掣
頃刻平蕪洒毛血雙拳霹靂劍鋒交五色綉紛錦文裂
莫公寫去非徒然君子夕惕終無愆性多耿介少思殆

山梁之時不可再

蘭岩山絕頂歌

蘭岩山高出西極東南諸峰秀無敵中有瀑流掛絕壁
建瓴直下三千尺僵木橫溪龍偃卧怪石夾道虎踞坐
驚風劃來慘么麼萬壑松聲海濤播躋崖躡澗俯復仰
洞府磬硤豁軒敞似聞列缺引霹靂亦多魑魅兼魍魎
黃熊奮犇青兕立寡鶴哀鳴斷猿泣我行欲息不敢止
憑高望遠憂思集九州四海何茫茫神禹之跡忽已荒

峨岷秋陰接太華洞庭倒景搖瀟湘孤雲低飛楚甸濶
征鳥竟沒吳天長五臺之墟控三峽之子何時歸故國
好在殘年十月冬相逢江上梅花白

送趙勉耕漢中省親行

一門父子全忠孝祇今獨數廬陵趙喬木千章湖水濱
諸峰羅立三山嶠前年昭代急賢良五色聯翩鳳凰詔
趙侯靜者嗜煙霞說著功名輒頭掉公車星火促嚴程
江海茫茫玉京寫奇材固合充棟梁至寶終須貢廊廟

乘濤直下五千里閭闔雲晴見初召聖主從容賜顏色
善道咨諏洞微妙外將大任托藩垣內擬超遷列樞要
趙侯稽首再陳乞昧死金鋪致辭峭一官泮真得所欲
模範裁成志思劭三春教鐸振儒林文聲奕奕開光耀
二郎萬里奉晨昏歸日叮嚀往來紹弟行既復兄何如
呼奴便秣追風驃楚雨千秋湘水祠秦雲萬古咸陽徼
鄴鎬西風拂髮寒峨岷夜月懸心悄關山愁見落花飛
客枕哀聞斷猿叫不圖采玉崑崙崙頂豈若尋源武陵竅

猗嗟趙侯萬事足如此賢郎誠克肖馬融帳下老萊衣
白首能無極歡笑送君不盡憶君情瑤琴切切孤鸞調
新詩錦軸遍須題別酒離筵莫停酌飄飄鴻鵠起天隅
六合清風蕩煩歎

短歌行寄宗玄蕭文學

憶昔北尋馬子洞二月風雨三冬寒乘舟濟川浪洶洶
驅車遵陸泥盤盤挹君豪名振河懸走過山陰識君面
燕頤虬髯熊豹姿當時令我喜欲旋吁嗟交道無早晚

誼合斯須傾肺膽翟公何署死生情阮籍徒為青白眼
金樽有酒池有魚魚肥可膾酒可斟張燈促宴諧終夜
紅爐照室光相射中有萬斛江南春綺裘瑤席香薰人
風流文采稀今古下筆雄詞躍蛟虎千金難買一朝閒
況是賢材兩賓主石林月黑子規啼我已醉眠無所知
夢覺雞鳴滿庭樹起望鄉國生離思別來忽忽歲月改
歌樓舞榭移光彩夕陽芳草落花時獨立平原悶如海
悶如海長思君何時重與細論文古來聚散有如此還

望青山歌白雲

和劉輝遠短歌行

閉門風雨鶯花老紅紫園林淨如掃晴來點檢江南春
一碧連天有芳草美人不見余心悲參辰出沒長睽離
睽離咫尺若萬里竟日悠悠勞所思琥珀爲黃金錯落
徒負高情同畢卓安得蒲萄變漢江便築糟臺齊華嶽
美人何時對青眼北樹東雲愁復晚雕鞍寶馬洛陽兒
瓊筵綺席新豐館朝回九重鳴玉珂夕飲百斛雙顏酡

青雲亦欲致身早，具若神龍淺水何。媿人胡為在丘壑，
縕袍不換朱衣著。固知藏器以待時，豈比尋常空落魄。
讀書勝遺滿籛金，誰識韋家祖父心。相思相望莫相及，
脩竹繞門流水深。

清隱堂歌為安城王使君賦

寰區全壁歸我皇，天下萬國歌虞唐。蛟龍播弄滄海水，
鸞鳳飛舞梧桐岡。岩廊多士方濟濟，草野遺賢淨如洗。
王君有材當用世，胡獨深居僻山水。秀莫秀乎瀘川九

折之迴縈佳莫佳乎青岡百疊之崢嶸就中堂構何嶙
峋予以考槃予以寧琴音泠泠山月小釣絲裊裊江風
輕君不學孔巢父掉頭入海隨烟霧又不學周彥倫先
貞後黠慚具名行藏得失付穹昊萬事不理心永清美
玉由來甘積韞紫蘿陰護柴門穩花雨穿林酒甕香松
雲拂石棊枰冷我登清隱堂堂高日初晏壽萱慈竹種
來多狎鷗馴鹿相依貫清風徐徐生石門薄日輝輝明
水村魚蟹隱見隔浦淑沙柳漠漠青雲屯此時王君高

興發蹇驢信步看山色不知世外功與名只愛山中風
與月風月無邊人未老堂春不盡堂花好古來富貴多
慙尤不若藏名以為寶

逢辛大全

天下之事何紛紛逐時變化如浮雲交游空多知己少
甚喜近日逢辛君辛君自是文章伯獵獵英聲動河北
明堂拜官不肯受愛向五湖弄烟月五湖烟月浩漫漫
見我唯將青眼看石牀露坐古月缺綈裘夜語新霜寒

烹羔宰牛且飲酒遮莫烏飛兼兔走人生倏忽豈暇愁
昨日紅顏今白首君不見銅雀臺又不見高陽里魏武
精靈安在哉山簡風流吁已矣只好生前日日醉何須
身後十年計君心愛我多豪放我亦愛君不流宕相期
早晚匡廬上遙借仙人九節杖禹穴龍門歷搜訪共和
青山白雲唱

次韻蕭仲鈞別懷歌

玉京縹緲開晴雲四海謳歌堯舜君龍騰虎變日繼踵

嗟爾尚甘麋鹿羣百花為城草為席烜赫陽精錦媽爰
肺肝五色結英華散作雄詞筆鋒出珊瑚玉樹交柯株
處予綽約紋牕疎斯須片月掛明鏡照耀銀臺光炯如
銀臺彷彿三山上弱水秋風起層浪謫仙何處跨鯨來
歌嘯雖雖五情暢永懷此樂那能歸一曲瑤琴傷別離
鸞箋寫就生平意寄與雲中南鴈飛南鴈飛飛楚天碧
誦言重見膠投漆遂令幽思不可忘走向雲林遠相覓
朝陽紫鳳鳴梧岡如此遊居誠有常又如神劍蘊玉匣

吐出萬丈之精光
精光倏爍凌空照
吾亦英豪不殊調
窮通得失安足論
且與劇談道中妙

送胡立峰大叔遊山東

春江雨漲七尺濤
杞樓飭駕聲嘈嘈
丈夫立志在遠大
所舉卓越非徒勞
高莫高兮九千仞
之匡廬五老秀色
分香鑪左里楊瀾
日震盪嵐煙瀑水
迷空虛深莫深兮
沈竿續蔓難測之
小孤西匯既瀦彭
蠡湖晦明頑洞混
一氣倏忽津涯知
有無直下山東二
百州名山大澤紛

相糾郊齊控魯屬吳楚古來豪傑多封侯生平曠達由
天性但分何方有形勝呼奴牽却五花馬市作行裝即
無吝腰間只佩蒼精龍拔出赤電驚雷風酒酣歌罷復
起舞臉暈欲奪桃花紅桃花正紅春雨晴芳草滿園啼
早鶯簫鼓聲停棹歌發又似前年春二月前年歸是去
年冬今年歸是何時節白鷺洲邊楊柳煙還鄉好見柳
依然莫言不折長條贈留取歸時穩繫船

河邊水

河邊水暮暮朝流不已水流去去無回波人生百年
能幾何昨日英雄氣如虎今日淒涼一抔土非不欲學
伊與周豐功盛烈天同休非不欲學巢與由明月清風
塵外遊窮通進退一有命用舍誰能改前定所以劉伶
稱達人只願長醉不願醒豪來揮筆頌酒德俯觀萬物
如浮萍

和荅橫溪隱者歌

橫溪之山何鬱鬱橫溪之流下盤屈就中隱者巢許儔

落落雲松百千尺有時清夜抱瑤琴海門出月琉璃碧
頽然醉卧松石間五色英華夢生筆金雞三號海色動
眼開一丈扶桑日恍惚騎鯨天上歸錦袍玉鈇光相射
大漠黃塵煙霧昏潼關白骨丘山積臨岐已見泣楊朱
叩角還聞歌甯戚何如隱者笑傲橫溪湄長枕溪泉漱
溪石

禾川歌送郭愉

禾川之水流東海浩浩蕩蕩千萬載英雄眼底今安在

衰草連天古城壞昔日樓臺歌舞園今朝牧馬成荒塞
廢興如此不足論空使愁人容髮改君今別我歸禾川
禾川之水應依然銀屏石下買春酒畫角洲頭移曉船
高堂侍養有慈母慎勿蹉跎事羈旅江山遙遙道路阻
可以何時復相遇禾川歌送君去嗚呼別君泪如雨

南城歌寄贈胡思敬

南城之山高嶺屹連岡疊嶂青雲端鸞翔鳳舞勢歷歷
馬馳牛卧形盤盤南城之水清見底浩浩千秋流不已

孤光瀕洞化魚龍雷霆五夜潛鱗起蘊奇蓄秀識者稀
積德累行膺昌期胡郎家住南城側五福由來天命之
前年恭承聖皇詔嚴親平步登廊廟聽旨遙瞻闔闔門
老大功名足誇耀翩翩三鳳鳴朝陽與時際會爭翱翔
為家為國不少暇忠孝兩情江水長伯也乘濤四十里
晨昏遠奉勤王事家山半載未歸來耳畔頻聞好音至
仲也進退懷深憂幹蠱驅馳那暫休持衡賦稅貴平理
供給餉饋無愆尤閭閻往往多豪縱豈若君家賢伯仲

只將孝義主中心美利榮名搖不動蹇予落魄無所為
壯志凌雲空自知求田問舍安足數附翼攀鱗終有時
胡郎愛我誠幽雅我愛胡郎絕瀟灑相逢一笑坐瓊筵
穩繫樓前五花馬狂來一飲三百鍾論交吐氣紫晴虹
人生契合在知己寧論得失兼窮通別來倏忽成今昔
兔走烏飛過箭疾相思重欲話中情極目南天楚雲碧
朔風蕭蕭鴻鴈鳴寒梅迎雪玉香輕折將欲寄不得便
為君悵望歌南城城南山水如圖畫古木虬龍鬱相亞

華堂結構高於山綵服斑斕照堂下堂前種竹百千竿
年年歲歲報平安萱花愛日色煒煒椿株化雨陰團團
君不學五陵年少誇遊俠又不學孤竹夷齊事高潔丈
夫在世貴成名何用飄飄比雲月城南山頭桑葉黃葡
萄萬斛生春光浩歌不盡萬古意安得一醉寬離腸君
才拔俗真雄壯囑君善保為民望當今聖代急賢良相
期更在青霄上

芻蕘集卷二

欽定四庫全書

集部

芻蕘集卷三

詳校官編修臣曹城

中書臣劉源溥覆勘

總校官進士臣繆琪

校對官學正臣陳本

謄錄監生臣戴天民

欽定四庫全書

芻蕘集卷三

明 周是修 撰

五言律

古從軍行五首

金鼓龍城出旗旄虎衛分
築壇新拜將飛簡急行軍
關路晴和雪邊烽夜照雲
樓蘭今未斬何以報明君

三十未成名從戎一片心
車輪裝白玉馬勒鑄黃金報

主時何晚安邊計始深轅門風雪夜撫劍一沈沈
萬馬不聞嘶天山雨雪時旌旗寒色慘鼓角夜聲悲漢
將雄韜出戎王敗壘移捷書星火急應到鳳凰池

轉戰桑乾夜匈奴半遁逃邊烽隨鼓歇海月傍營高總
笑探囊易誰言破竹勞指時龍闕下朝服換新袍

寶馬流星劍金戈明月弓千旗分別將萬騎拱元戎玉
帳兵符祕轅門殺氣雄長驅沙漠外誰數衛青功

昭君怨

一從關塞隔長懸雙淚痕未曉戎王禮堪懷漢主恩風
沙無白晝雨雪又黃昏何似隨陽鴈年年度玉門

關山月

今夜關山月何人不苦情祇宜明漢國豈忿照邊營雲
陣迷兵陣風聲亂鼓聲長安光滿處閨思更難平

北樓

春色滿南州鄉心上北樓青天萬古意白日半生愁城
曉鐘纔動江晴霧未收人間幾興廢依舊水東流

送友人之章貢

章江幾千里瀉出碧雲間之子扁舟去何時故國還烟
波春思渺島嶼夜天閒望望乘槎者高風不可攀

早發西城

城雞纔一唱促駕不言勞地轉南山近天迴北斗高宮
槐交大道御柳夾長壕過盡樓臺影參差入野蒿

春夜分韻得江字寄蕭君子儀

當代論材學如君信少雙詩名傳大地文勢決長江苔

紫生衣桁桃紅入酒缸無能謝塵鞅從隱鹿門龐

望武山佑仙觀

天上神仙府人間道德門水分千澗遠山拱一州尊松
鶴心寒暑雷龍警旦昏何時登絕頂瀟灑望乾坤

憶雲峰寺

憶昔登臨日披雲謁上方樓臺通海氣花木近天香佛
骨陳千古禪心眇八荒重來深有趣準擬在秋涼

秋夜憶禾川舊友

迢迢江嶺外千里故交情人宿沙連驛鳥啼樹繞城雲
開疎雨斷月落衆星明獨對蕭條夜寒蛩不可聽

仲夏日暮憶胡筠客金臺

清風滿竹扉細汗冷絺衣蓮愛疎紅靚槐宜密翠肥野
塘雙鳥度溪寺一僧歸之子金臺客音書何太稀

夏夜憶九成姻兄

涼灝生微月纖纖出素雲移牀嗔竹影掩袂惜荷芬酒
店沙頭靜漁燈浦口分故人隔江水何事久離羣

田家雜興五首

竹外四三家通江徑路斜得錢新買犢就水屢移車稚
子晴探樵荆妻早種瓜日高初飽飯種火去燒畬

竹底徑逶迤人來犬未知天寒樵事苦雨濕飯香遲草
接茅簷長藤穿甕牖垂老翁衣百結時却賣蚕絲

洗竹添新笋培桑減舊條就風鑽火易鑿地引泉遠簷
掛新收筍池浮舊棄瓢西隣春酒熟深夜却相招

畔樵無遠地嫁娶止比隣山果隨歸慣溪魚入饌頻教

疎難盡禮俗朴易居貧但祝時年好燒錢拜社神

華葵連畦綠枇杷滿樹黃前簷臨澗逼後逕入山長桑
柘肥春雨鷄豚散夕陽子孫知幾世老死不離鄉

秋日贈別西溪故友

一劍南遊慣山行秋始涼草枯泉脉見樹合地形長去
馬衝殘雨歸鴉背夕陽臨岐更何語涕淚在衣裳

山居

幽居隱薜蘿誰問夜如何風定雲昏斗星稀月度河征

鴻聞去遠落葉坐來多見說邊庭士防秋尚擁戈

幽居晚雨

一戶通幽徑依依敞竹門
亂雲低白晝疎雨濕黃昏
犬吠當林屋鴉歸隔水村
呼兒供棗栗獨自酌芳樽

蔣氏山莊納涼

綠樹繞方塘平橋水氣涼
波明金鯉動石淨錦苔香
把酒忘鄉遠看棋愛日長
此中真自好何必泛滄浪

蔣陵池上斑竹

金安四月八日
卷三
萬古蒼梧泪斑斑竹上頭何緣湘岸景還在蔣陵丘
翡翠晴如洗琅玕潤欲流當年人不見無限別離愁

五言排律

金陵古意

天地開王國山河拱帝州雙龍青漢闕九鳳碧雲樓
甲第俱連戚高門總列侯雕興迴玉軸寶馬鞍絨
緞城樹交馳道宮花隱御溝旗旄嚴扈從笳鼓競
周游長樂春風起昆明宿雨收曉鐘聞閤苑仙仗
繞瀛洲公子辭金

屋王孫上綵舟
哀絃隨妙舞
急吹雜清謳
錦殿祥烟積
朱城佳氣浮
仰瞻凌斗極
俯瞰迴林丘
萬古英雄地
繁華自不休

送友人之延平

別路三湘北
離人五嶺西
成行愁夜雨
不寐聽晨雞
絃奏添惆悵
壺觴益慘悽
江分吳地濶
山界楚天低
潘岳塵應斷
陶潛路豈迷
河陽花發遍
彭澤柳生齊
藉藉征途語
蕭蕭去馬嘶
曉亭連戍壘
春樹暗蠻溪
岸轉楊梅

落林深謝豹啼甌閩王化遠望爾作雲霓

再賡酬光遠文學

王國今多士君誠拔萃豪用當天下器選奪俊中髦匣
寶塵堪拂山輝石不韜六龍攀駕遠五鳳助樓高律協
嵇中散書工蔡綺曹誅苑居卜杜問菊隱成陶夏木陰
分座春江色染袍洞雲隨蠟屐沙雨閣魚舠城市長收
迹庭闈日服勞寫方諳藥性篝火費蘭膏節峻誰能屈
名揚豈待褒周原臨眺望蔣徑入遊遨已有扶輪輒寧

無詣闕臯聖朝思播德汙吏忍懷饕經世文推傑開邊
戰息麇參差登要路變化逐宣毫材展空羣驥功參立
極熬稜稜豐邑芭了了浚郊旄治威祥麟至威凌猛獸
迓共傳三益美莫破一言牢薦掌寒宜蟹裁裘暖稱羔
山菹藏華蔌家釀出葡萄管輅纔通易揚雄復廣騷池
乾稜就採畦潤草從薺細鯉金明澗輕鷗雪點濤詞宗
兼鮑謝詩祖辨韓毛慕學情尤固論交志敢慙別離增
愀愀邂逅釋怛怛老鶴驚翔翥窮猿慘叫號終期膺歷

試要不愧鉛刀

寄白下彭君

磧浦青楓路茅堂白水村落花憐杜宇芳草怨王孫別
去冬徂夏憂來旦復昏赤心元自許高誼與誰論流俗
難藏器陳情欲叫閭精誠交霹靂忠憤走輶轡驚驚翔
丹穴騏驎出大宛駿蹄當駕馭逸翮遂飛翻用世材雖
重端居道亦存萬家岐下邑五畝洛中園徑曉晴生竹
堂春煖護萱河流通馬頰山勢鎖龍門洗藥香分礪看

松翠滿軒汀沙眠稱鶴岩果盜隨猿德愧成蹊李名慚
學圃樊莫收金鑄錯但保玉無痕感舊愁空積懷賢慮
政煩長歌謝知己浩浩一乾坤

七言排律

園樂詩為東園伯丈賦十二韻

先生結髮好丘園老隱非同學圃樊綠竹盛時長少事
紫蘿深處寂無諠墾添荒址餘多地灌引清渠出有源
水暖魚蝦隨甕汲畦春蛙蚓逐鋤翻晚菰漫采苗兼韭

亂莽閒薶卉雜萱紅甲紺牙浮土面碧莎蒼耳護牆根
午窗棋罷雲行影夜院香消月過痕松下闢茶聯石鼎
花邊勸酒倒銀鐏琴壇久任封苔淨硯沼常因洗藥渾
植得芝蘭沾花雨樹來梅柳發晴暎驅馳攘攘憐南北
棲止洋洋自旦昏誰識先生真樂趣浩歌落落信乾坤

虞墀岡為草意劉先生賦十韻

西望虞墀遠勢孤何人生預築玄廬極知劉氏悠悠意
要與滕公鬱鬱符鳳羽幽篁和霧長龍鱗老檜受風呼

薜蘿交鎖塵蹤斷苔蘚重封石甃虛天靜鬼神嚴守護
地靈罔兩暗毆除三年製椁桓司馬五月投江屈大夫
泉下玉魚終出世雲間銅雀竟成墟先生此計成超古
高士他時合致葛種德由來膺上壽作歌遙為贊良
圖岡頭一道南征路千載亭亭憶相儒

貽中州劉思誠十韻

哲人修已日鳴謙童卒都稱老孝廉閉戶讀書情自適
升堂調膳味常兼起凡材質瑤瑜美拔萃詞鋒劍戟銛

交誼已堪期。鮑叔文名終不愧。江海先天未濟風雲會。
萬國先同雨露沾。邂逅每承青眼顧。棲遲深覺素心恬。
林通鳥道晨看鶴。水落魚梁晚得鮎。棋罷柳煙晴護榻。
琴閒松月冷窺簾。悠悠今古何終極。納納乾坤豈屬餐。
有道乘時須濟世。尚耽詩酒學陶潛。

起晦鍾文學有詩呈國子蕭先生倚歌和贈

一從棹雪剡溪歸。五載懷賢思不違。耽酒每聞陶靖節。
看詩長慕謝玄暉。延津佩劍愁龍化。洛浦吹笙想鳳飛。

休用六韜窮術數且將三易盡精微驛驢出路增時價
美璞藏山耿夜輝桂嶺隴高魚度阻楚天雲遠鴈來稀
郊居晚雨深蘿薜洞府秋風老薔薇割席管寧原自負
卜隣王翰願相依頻年異縣傷離別何許連牀聽發揮
稍待約同黃禮輩再隨流水覓岩扉

再和起晦韻寄禮用黃兄

前月南溪送遠歸別來相念不相違幾回望眼迷陰雨
無限愁心對夕暉萬古興亡雲北度一年寒暑鴈南飛

清時文彩憐君盛聖代才名愧我微
醺酒甕晴春蟻沸
讀書窓暖夜螢輝
紛紛世態尋常改碌碌人生七十稀
華煥漫求豐獄劍夷齊空餓首山薇
歸田始覺畊還好
卜宅長懷善可依
雙履莫從雲外躡
一觴難共月中揮
臨流和得相思曲
寄與西風到竹扉

芻蕘集卷三